

四庫全書

子部

欽定四庫全書

通雅卷十三

明方以智撰

地輿方域

陸文裕曰予嘗欲取今之州縣推而上之以會
於禹貢之命名因以著古今離合遷改之實為
一書宋蒲江倪朴文卿嘗作輿地會元志四十
卷惜當時以布衣著書力不能傳其自叙有曰
今學者急於利祿專務時文故不識者不肯目
而識者未暇覩也悲夫元符中蜀人稅安禮撰
地理指掌圖臨江吳淞著宇內辨智皆不得見
郭景純注山海經寓寓意耳鄺道元注水經身
未得至南方也嘗覽朱考亭沈存中吳虎臣范
公稱王伯厚及楊升菴章本清馮嗣宗各有所

辨欲以朱思本畫方配里法做謝莊之截木分
合就各地古事編圖會括諸志于修攘考一時
不及姑鈔記所知以俟
崇禎癸未夏方以智記

河東河西河南河北河內河東淮北淮西江北江南山

東陝西章潢所采宋人之論詳矣 有兗州之河東有

并州之河東

黃河舊道三代以前自宋衛州之黎陽縣近折而北流故北京及河北東路諸州在

河之東即古兗州之域故周禮職方河東曰兗州爰自周定王時黃河舊道漸以湮塞秦漢以還河堤屢壞乘上游之勢浚而東下故兗州之域隔在河北而河東之名乃移在并州戰國以來子史中乃謂河東之地皆指宋朝河東路而言之即古并之域也智按此北京謂大名府
有雍州之河西有涼州

之河西

黃河源自崑崙傍積石北流餘二千里至於宋銀夏之交稍折而東流不盈千里而折而南流

故宋永興軍路鄜坊丹延諸州在河之西而河湟之間鄯涼甘肅諸州亦在河西戰國之際所稱西河地即指廊房丹延之間而言在雍州之域也西漢以來有中土所稱河西地即指河湟而言古涼州之域也

之河南有邊境之河南有中國之河北有邊方之河北

黃河大勢如覆斗之狀而關中正在斗間中原遼當如衡故宋之京畿西路在河之南斯中土之河南也而綏銀勝夏諸州亦在河南即邊境之河南也河北東西路在河之北斯中國之河北也而陰山揜海之間有秦長城外地亦在河北即邊方之河北也三代以前河南之稱止在中土秦漢而下奪外國南牧之地列為郡縣亦名之曰河南陳隋以前河北之稱止在中國李唐之初塞外突厥之地悉為郡縣亦名之曰河北春秋傳中所

稱河南河北之地皆指邊境等地而言與前史至不相侔

有指一郡而言者有指一

州而言者有指一道而言者

如中土河南之地今古一名而兩漢河南之稱惟指

一郡而言即宋京西屬縣兼鄭孟二周之境而已姬周河南之稱則指一州而言即宋東西二京及京西南北路之地李唐河南之稱則指一道而言包古青徐兗豫四州之境奄黃河以南皆是也宋為東西南三京及京畿四州故周之河內異乎漢之河內

周禮職方河內曰冀州即宋河北東

西路地漢之河內乃右

漢之河東異乎唐之河東

漢河東郡

即宋河中府及慈隰晉絳解五

古之淮北乃宋之淮南

宋宿亳二州自開國以來至於

而宋之河北乃古之河

李唐皆在淮北宋乃移屬淮南

東

宋朝河北東路之地三代以前屬河東

淮西一名也有在京東有在京

西

淮道自西而東時折而北流故淮北之地間名淮西如漢封劉交為楚王王淮西則宋京東西路之地也

唐裴度身督戰遂平淮西則宋西北路之地

江西一名也有在江北有在江

南

江道自西而東時折而北流故江北之地間名江西而魏志武帝紀稱江西遂空則宋淮南東路之地也

晉紀稱石勒陷江西壁壘百餘則宋京西南路之地也至五代史稱鍾傳據有江西乃今江南西路之地江

南一地也有稱江左有稱江右

金陵居長江下流前朝有江南者皆都之據金

陵而言則江南居左四瀆之流皆自西而東天下之形勢亦然以中原而言則江南之地居右故前史兩稱之

山東一名也有指河南而言者有指河北而言者

前史有山

東之稱者皆據華而言之則其所謂在華山之東也其地正在河南而稍及河北之近河南者至杜牧之罪言則所稱山東之地專指河北而言也陝西亦一地也虞夏曰雍州商周曰

西土春秋為秦國戰國稱關中楚漢之際謂之三秦兩漢又名山西宋始為陝西路耳書稱河亶甲居相即今之相州也春秋衛侯燬滅邢即今之邢州也楚子入陳楚師滅陳皆今之陳州也齊師滅萊即今之萊州也楚子圍鄭即今鄭州之新鄭縣也齊侯侵蔡即今蔡州之上蔡縣也若此類未易概舉蓋履其地不敢沒其名也

然而遷徙不常考証或疎至有已非其地而空存其名

者如春秋吳師入郢近于今之郢州而非也

古郢城在今之荆南

府界去郢州餘三百里宋郢州即承天

秦師入滑近於今之滑州而非也

古滑國今在東京偃師縣之鄉去滑州餘四百里

楚人滅舒近於唐宋之舒州

而非也

古舒國今在廬州之舒城縣去安慶餘三百里

楚人滅黃近於今之黃

州而非也

古黃國今在光州定城縣去黃州四百五十里

楚人伐徐近於今之

徐州而非也

古徐州今在泗州臨淮縣之徐城鎮去徐州垂五百里

傳稱允姓之

戎居於瓜州近於今之瓜州而非也

古瓜州地在今汝州去瓜州垂三百

里有西亳南亳北亳而皆非今之亳州也

西亳在今偃師南亳在穀

熟縣北亳在考城縣

有東號西號南號而皆非今之號州也

東號在鄭

州滎陽縣西號在鳳翔府號縣南號在南陵軍升陸縣

有東楚西楚南楚而皆非

宋之楚州也

東楚今蘓州西楚今徐州南楚即今荊州府

古之酒泉在河南

而今之酒泉在河西

左傳王與號公酒泉之邑實在于河南而西漢而下迄于今有酒泉

郡漢屬河西今在徽外

古之丹陽在荆南而今之丹陽在江東

左傳

稱楚子邑于丹陽今在荆南府枝江縣內今丹陽郡乃潤州也

古之豫章在江北今之

豫章在江南而皆吳楚之境也古之澶淵在河南今之

澶淵在河北而皆宋衛之郊也

襄二十一年諸侯會于澶淵實宋古都所謂澶淵

聚者即其地正屬河以南而趙宋之澶淵乃在河北天雄今大名府開州

樂蟠始臧毛氏新喻中廬丹陽匡山謝陽之謠皆王楙

之說也

慶州有樂蟠縣本漢畧畔道地後訛為樂番

鎮戎軍有笄頭山隄囂使王元猛塞雞頭道即此也後

訛為訐屯山涼州有姑臧縣河西舊事謂舊塞外葢藏

城也後訛為始臧婺州長山縣本長仙縣其地赤松子

採藥之所後訛為長山北京館陶縣有屯氏河漢溝洫

志謂河北沒於館陶分為屯氏河後訛為毛氏河臨江
新喻縣本新渝縣蓋有渝水故名而唐天寶後相承作
新喻隰州石樓縣本漢吐軍縣後魏置吐京縣亦音語
之訛也楚鬻熊始封丹陽則在今歸州秭歸縣後楚文
王徙都江陵府枝江縣亦曰丹陽漢於宛陵置丹陽郡
隋于丹州置丹陽郡唐于京口置丹陽郡其地不一而
西漢志乃以曲阿之丹陽為楚所封誤矣漢文帝封淮
南王長子陽周侯賜為廬江王應劭曰廬子國即廬庸

之地按左傳廬戎自在宜城山中劬誤以中廬之廬為廬江之廬矣舜漁雷澤正城陽之雷澤而周處風土記乃以吳之太湖大雷山小雷山為舜漁之所子胥之胥山在嘉興東南而張晏乃以太湖之承胥二山為子胥之山李白少讀書于匡山正綿州大小匡山而寰海舊注乃指江州匡廬山為白讀書之所或白遊處焉耳後漢樊丹封射陽侯正詩所謂申侯番番既入于謝之謝地也而傳乃以為射陽按射陽在山陽西即高祖封項

纏之地非丹封地也樊毅碑曰謝陽之孫此可驗也

韓退之南陽在修武非鄧州也南陽懷州修武縣有

南陽城左傳曰晉於是始啓南陽即此智按韓退之正

修武人今為懷慶府修武縣孟縣亦有韓愈別墅俗呼

韓莊金石志載孟縣皇甫湜撰韓碑世人以鄧州之南

陽為退之之里誤矣其稱昌黎者其先昌黎人也愈封

昌黎伯今永平府昌黎縣有韓祠馬融曰晉地自朝歌

以北至中山為東陽朝歌以南至軹為南陽應劭曰秦

改名修武臣瓚云韓非書秦昭越趙長平而伐修武時
秦未兼天下修武之名久矣秦昭紀魏入南陽以和張
儀傳魏絕南陽白起傳攻南陽太行道絕之輿地廣記
修武本商之寧邑武王伐紂勒兵于寧更名修武

蕭何南陽之鄴在楚之光化非沛之鄴也 當時在南
陽者今在襄陽之光化縣此蕭何封邑也沛縣之鄴本
作鄜音嗟今亦不在沛縣在歸德府考城縣之鄉間尚
有鄴城橋古今分畫境界學者一時未考宜其隨聲聽

訛耳余嘗論之曰漢地理志載南陽鄧縣侯國不言沛之鄧為侯國非明驗乎沛之鄧為鄧誤于班固之碑王莽之改水經注之引也班固泗水亭碑曰文昌四友漢有蕭何序功第一就封于鄧合溪曰孟堅必知封地則南陽之鄧有嗟音智直謂古時韵粗班固亂叶耳江統徂淮賦言何封于沛矣水經注渙水逕鄧縣故城南襄十年公會諸侯及齊世子光於鄧王莽之鄧治矣朱謀瑋曰鄧字誤三傳皆作會于祖古文祖通鄧應劭曰作

嵯漢地志沛郡鄆縣注本作鄆王莽曰鄆治故遂以鄆
為鄆古人讀書已浮何怪今人邪又曰沔水過鄆縣謂
之鄆頭高帝五年封蕭何薛瓚曰今南鄉鄆頭茂陵書
曰在南陽王莽更名南廋沔水又過筑陽東師古曰南
陽蕭何封邑音贊本春秋陰國唐為懷州陰城縣有何
廟何薨高后封何夫人同為鄆侯小子延為筑陽侯文
帝罷同封封延元時為光化軍今則為縣屬襄陽府鄆
字本義則百家為鄆音贊寒韵存此則聲轉而廣韵收

之歌韵有鄮註曰封邑則誤矣升菴弱侯定以沛鄜為
蕭何封邑而云師古無據者大謬也一統志載永城縣
有鄮侯城為何食邑以訛傳訛亦猶承天府之陽春亭
以宋玉生此郢州耳總之漢志分侯國延為筑陽侯二
證最確而班固之韵乃古通轉之口齒猶攢之从贊難
之讀娜也恕先云江淮以韓為何京山云閒介之轉為
个此可推矣

詩六月篇之鎬非豐鎬之鎬也 靈夏等地即六月所

謂侵鎬及方也有什賁故城漢置朔方五原郡孔氏曰
劉向疏云吉甫之歸周厚賜之其詩曰來歸自鎬鎬去
京師千里王肅以為鎬京王基駁之朱氏曰劉向以為
千里之鎬疑即朔方也

昆明池正鎬京地也 潘岳關中記曰昆明池曰靈池
堯治水訖停船此地蓋堯已有池漢因而深廣之智按
此說大謬昆明滇池名漢武開以名之曰習水戰已為
鑿說况堯停舟乎徐廣曰豐鎬相去二十五里通典曰

京兆長安縣西北靈臺鄉豐水上是也鎬今昆明池鎬
陂是也昆明鑿而鎬京為池隋城亡而漢都為苑稱引
古昔者豈可不一覈耶

陶令八十日之彭澤非今小孤前之彭澤也 古彭澤
縣在今湖口縣東三十里漢置晉隋因之凡左蠡而北
大孤而東皆其地也唐武德五年改彭澤為浩州遷于
浩山下至今湖口九都號五柳鄉八都號彭澤鄉有三
學寺祀淵明有洗墨池玩月臺吳草廬為記南唐始析

五柳彭澤二鄉之地為湖口縣見九江志若以小孤江之彭澤縣為淵明解綬地則非矣

大別在漢陽非安豐也 孔氏言大別在壽州霍山縣宋之六安也史記索隱云在安豐縣此誤矣其實在漢陽府亦曰甌山魯山左傳楚拒吳濟漢而陳自小別至於大別小別在汭川今漢口世傳大別龜山黃鶴樓磯蛇山也智又考水經云淩水出廬江雩婁縣南大別山注云俗名檀山峴即安豐西南蓋大別有同名而注尚

書者誤

廬山有四古會稽竝轄淮南塗山實在壽春非山陰也
淮水過當塗縣非今太平之當塗也 塗山在壽春東
北濠州鍾離縣西九十五里禹會諸侯周穆亦會智又
按晉常璩巴志言禹娶塗山今江州塗山是也江州縣
郡治塗山有禹王廟及塗后祠北水有銘曰張太守於
此仙去有粉水世謂江州墮林粉也水經注引哀十年
禹會諸侯于塗山杜預曰塗山在壽春東北史記索隱

又以塗山在今九江余按國語仲尼曰禹致群臣于會稽防風後至殺之其骨專車劉向王肅竝有此說則鄺君似以塗山在會稽王伯厚確以為在壽春或者禹所至山別有會稽之名乎地理志當塗侯國也淮水過之禹娶塗山即其地呂覽曰江淮以辛壬癸甲為嫁娶日此足證也太平之當塗乃僑立名耳杜預所謂塗山在壽春縣東說者云今濠州是也吳越春秋亦以會稽有塗山又兼載塗山之歌應劭云塗山在永興北或云蕭

山縣是已疑矣蘇鄂演義云塗山有四一會稽二渝州
三濠州四當塗皆有禹跡蓋傳會耳章本清謂柳子厚
塗山銘蘇子由塗山詩指在濠州皆非是此疑未決耳
王楙引翠微考異以宣之當塗正禹之娶所則楙猶無
識矣當是古之會稽所轄者大如戰國之楚則徐州南
京皆是也句踐滅吳則吳地皆越故通稱會稽漢分為
吳郡會稽郡故又合言吳會或曰濠州之塗山甚小豈
能容諸侯不知古言其會地豈直在山上耶

壽春有荆山因遷郢而名也 楚自昭王之後又歷十
一傳至考烈王始徙都壽春韓非子所載卞和獻玉事
乃在厲武文三王之際昭王上接武王已越十世當三
王時鍾離何嘗屬楚而彊謂卞和至此山邪新序又謂
抱玉而泣在共王時雜記又謂在懷王及其子平王時
平王乃昭王父下距懷王九世共王上至武王六世差
矣陳霆尚以懷遠荆山為卞和獲璧處更誤

首陽有三 一蒲坂二隴西三洛陽王勉夫以夷齊在

洛陽論語註謂在蒲坂非也夷齊令支人冢在肥如漢志遼西令支有孤竹城水經注雷首名獨頭山夷齊所隱都穆謂中條為雷首下有水曰雷澤

歷山有五 一河中府二齊州歷縣三冀州四濮州雷澤縣五紹興曾南豐齊州堂記云舜耕歷山漁雷澤陶河濱作什器於壽邱就時於負夏鄭康成釋歷山在河東雷澤在濟陰負夏在衛地皇甫謐釋壽邱在魯東河之北河濱在濟陰定陶西南陶邱亭耕稼陶漁皆舜之

初事在一時地宜相近孟子又謂舜東夷之人呂覽舜
葬于紀市按鳴條在今贛榆縣有蒼梧山近莒之紀也
歷山在齊者是圖記謂南山為歷山以灤水出歷縣也
世因河東雷首山一號歷山為水所出舜娶堯女所居
謂歷山為雷首之別號附會也陸魯望云世謂舜田歷
山象耕鳥耘聖德感之非也蓋耕深似象步耘疾如鳥
啄李石載周處記舜葬上虞始寧剡縣多柞吳會以柞
為櫪故曰櫪山此尤附會

趙之扞關非楚之扞關也 趙扞關在陸道楚扞關在水道楚肅王四年為扞關以拒蜀

李牧所取方城非汝葉之方城也 左傳之方城在汝州葉縣西南唐勒論作萬城万之訛邪漢廣陽郡方城縣後漢屬涿郡一曰燕方城縣唐貞觀時自章信城移固安縣治此李牧伐燕取方城王肅曰今涿郡方城縣有韓侯城又上庸堵水東逕方城此亭名也上庸今竹山縣有方城山堵水注于漢曰堵口下有滂灘

下蔡為硤石城非獨陝州之硤石也 通典梁大同中

于硤石山築城拒東魏天監十五年魏崔亮攻硤石即
今潁州下蔡也水經曰淮水逕山硤謂之硤石周世家
克壽州徙州治此魏諸葛誕舉事王昶據硤石以通誕
即此城又晉胡彬援壽春既陷退保硤石亦此城也

鍾離非今中都城 郡縣志濠州阻淮帶山晉淮南郡
鍾離縣安帝立鍾離郡宋兼置徐州為重鎮蕭惠休蕭
坦之昌義之康絢所守是也隋唐為濠州通典鍾離縣

東四里有古鍾離城即魯昭四年楚城鍾離又縣東一
里有小東城秦始皇築之以鎮濠州者終犂即鍾離史
伍子胥傳吳拔楚鍾離居巢注古鍾離子之國世本作
終犂

石城非石頭城也 羊祜傳吳石城守去襄陽七百餘
里祜以詭計令吳罷守祜以孟獻營虎牢而鄭人懼晏
弱城東陽而萊子服乃進據險要開建五城收膏腴之
地石城以西盡為晉有郡縣志郢州長壽縣城本古之

石城背山臨淮水吳於此置牙門戍城羊祜亦置戍焉
郢州西北至襄陽三百餘里水經注沔水南逕石城西
城羊祜所立元康元年分江夏西部置竟陵郡治此即
今之承天也郢本為荊州承天為郢州則自北周改名
而唐因之耳庾亮欲移鎮石城蔡謨曰沔水之險不及
大江非廟算之勝亮不果移樂府有石城莫愁郢有莫
愁村弱侯爭以為白下石頭城女子誤矣河中之水歌
是又一莫愁也且石城非一魏牽招傳孔明在祁山遣

使結連軻比能比能至故北地石城與相首尾又高州府贛州府皆有石城叙州府金華府永康縣皆有石城山山名石城石門者不可勝數孫權初都京京口也十七年權作石頭城臨江歐陽公于役志言次江口夜大風次清涼則今之洲乃數百年間事也

石頭有四 韓退之有次石頭驛寄江西王中丞閣老詩故今洪州石頭驛皆以為證大觀三年汪藻彥章為江西提學作石頭驛記吳曾言江西有兩石頭石頭遷

住南嶽地名石頭與白下石頭為四

姑蘇或作姑胥姑餘 卮言曰王順伯高德基謂姑蘇

乃姑胥也凡山與臺皆以伍胥得名吳人鄉語以鬚為

蘇故誤曰姑蘇後遂為蘇州按續圖經紀云姑蘇臺一

名姑餘史記正義云在吳縣西南三十里山水記闔閭

作又云夫差作越絕書云闔閭造九曲路以遊姑胥之

臺然則姑蘇之或謂姑胥或謂姑餘不可知而始于闔

閭成于夫差豈得云因伍胥而誤也姑蘇自是故名第

古以名臺今名驛而正德中纂志書者冠以姑蘇卻大可笑

番麗梅里也 太伯居梅里今之橫山

許墅本為虎嘯 因唐諱虎錢王諱鏐而改虎邱劍池四字世傳顏魯公書乃譌也魯公無不諱虎者唐人修晉書已稱武邱武林神武門矣

皋橋皋奉卿居也蛇門梅福所隱也岑寧支硎也 俱見吳地志漢議郎皋伯通字奉卿居皋橋梅福隱蛇門

或稱夷門支硎山支道林所居白馬升雲而去今名嵒
嵒山越中新昌縣天姥對峙沃洲山亦云支遁居之
語兒亭當為禦兒 雋里地縣南有語兒亭言蠡與西
施通生一子此附會最可笑者而陳晦伯胡元瑞乃引
以駁升菴西施沈死之說豈不更可笑邪按吳語曰吾
用此禦兒臨之韋昭注禦兒越北鄙在今嘉興言吳邊
兵若至吾以禦兒之民臨敵之元瑞未讀此乎

雅宜山舊名娜如 元美曰娜如山元虞伯生改為雅

宜凡夫曰南朝張廷尉女曰雅兒死葬處訛為雅宜吳士王寵字履吉別字雅宜今其山又改為笄茹

干言二地而今為一山 詩干與言二地曹氏以為發干縣隋志邢州內邱縣有干言山今北直順德府唐山縣西北四里有干言山

汝陽之天中山天之中也 輿地以河南為中而汝寧又居河南之中故汝陽縣北三里有山曰天中云測影植圭莫準于此然則取黍于上黨亦偏矣或曰或言此

地夏至日中無影非也此地距北陸黃道十度日晷恒在南廣州則無影耳

醋溝在山氏城北 岑參詩雁塞通鹽澤龍堆接醋溝
方回云醋溝不知何地升菴按闕駟十三州志山氏城
北為高踰淵又東北醋溝水出焉水在中牟郭緣生述
征記醬魁城至醋溝十里鹽澤見穆天子傳即鹽池
盧峯即盧溝 吳起云夏桀之國盧峯在其北升菴曰
即盧溝也峯古皋字則今桑乾河矣

春秋之江黃非今黃州九江也 江國在汝南安陽縣
安陽故城在蔡州新息縣西黃國在汝南弋陽縣今光
州定城縣水經注黃水入淮曰黃口有黃城

公瑾破曹在烏林非坡公之赤壁也 韓子蒼知黃州
訪栖霞之危巢不復存矣詢赤壁乃赤嶼磯也顧起元
曰赤壁有五漢陽漢川黃州江夏惟嘉魚西南八十里
江濱烏林南岸赤壁是也杜牧有寄岳州李使君詩云
烏林芳草遠赤壁健帆開此則是矣或曰謝疊山猶于

嘉魚南岸石崖間見赤壁二字

出弗其山之汶非水經壽張入濟之汶也蜀之汶則岷
矣又有遼東汶城 淮南子曰汶出弗其高誘云弗其
山名在朱虛縣東酈氏曰是乃東汶非水經所謂入濟
者也汶出太山萊蕪縣原山過奉高縣博縣無鹽縣自
桃鄉四分曰四汶左二水雙流至無鹽郕鄉平陸故城
合為茂都澌次一汶至壽張故城為渚右一汶逕舊宿
國與洽鄉注長直溝然今不可考惟汶上縣水至明若

秦宓所云汶山江出其腹即岷也又有遼東之汶城盛
輔之曰即孤竹國也遼東音文山東音問四川音民貉
逾汶則死岷山也今一統志列為三曰整汶徐汶青汶
本清曰入濟之汶見禹貢論語之汶上書傳謂之北汶
即今大清河入濰之汶見漢書入沂之汶見水經齊有
三汶清河為大逖征記泰山郡水皆名汶有北汶羸汶
柴汶牟汶皆源別流同又在三汶之外升菴云古作南
嶧北嶧或曰王又新汶志言汶過于南旺戴壩甚詳

留侯封邑在沛非陳留也

張良封留侯留在徐州沛

縣今留城鎮有留侯廟存焉或以陳留為子房封處廟貌巍然誤也王洙曰宋武北征過陳留下教修復其失已久矣按傅亮為劉裕修張良廟教云塗次舊沛停駕留城本謂沛縣之留城一統志已載之王洙語誤

沛之蘄非江夏之蘄也 苞水入漁逕蘄縣蘄縣漢屬沛郡浹水潼水蘄水皆注于淮陳涉起兵於蘄大澤即此也江夏有蘄春縣有蘄水出五蠻中晉改蘄陽縣即

今之蘄州也

漢中有沔陽城非今之沔陽州也 水經沔水逕沔陽

故城南注蕭何所築昭烈即漢王位於此城南對定軍山有孔明廟習隆表召伯甘棠范蠡金像而立者也今沔陽州則屬承天府

父城非城父酈道元誤引為一 漢地理志潁川有父城縣而沛郡有城父縣水經注言汝水逕邾縣故城合潁水潁出晉陽將孤山東入父城縣與柏水會逕賈復

城此正潁川之父城乃忽引楚平王大城城父居太子建杜預曰襄城之城父也此誤矣一統志汝州寶豐縣有父城古蹟云即左傳楚之城父城

郢鄢即荆襄 鄢襄陽府郢荊州府也正義曰鄢故城襄州率道縣南九里郢城在荊州江陵縣東北六里楚又自丹陽徙郢後九世平王城郢後十世秦拔郢徙陳吳曾曰郢江陵之紀南城是也春秋有鄢水左傳楚屈瑕伐羅及鄢亂次以濟是也其後曰夷水謂之漢水又

曰蠻水道元所云避桓溫名改者也白起壅灌拔鄢為縣漢惠改曰宜城春秋有數鄢其曰鄢者戰國策作鄢楚昭陽伐魏取鄢漢屬潁川唐鄢城縣屬蔡州宋屬潁昌府此時屬開封府許州即漢之潁川也鄭伯克段于鄢周語注妘姓國為鄭武公所滅漢陳畱有鄢縣應劭曰克段此地也升菴引趙匡曰鄢當作鄢在緱氏縣南為近後漢鄢屬梁國又晉敗楚鄢陵漢潁川有鄢陵縣注云六國曰安陵宋東京鄢陵縣也此時屬開封之鄢

陵鄭邑戰國安陵也郡縣志故鄆在宋州寧陵縣南五十二里鄭伯克段於此今寧陵屬歸德府莒亦有鄆陵公孫敖逆婦于莒郊鄆陵登城見之美其曰鄆亦不一楚徙壽春亦命曰鄆其為鄆州者竟陵古鄆國郡縣志云在今鄆州長壽界竟陵大城是也今為承天府明初安陸州也三國魏曰鄆州晉分江夏西部置竟陵郡後周以其地置鄆復二州武昌府劉宋時亦曰鄆州宋孝武分荆湘江三州之八郡為鄆州鎮夏口此武昌府也

隋平陳改為鄆州今鄆都白雪概多誤用而承天古蹟
且有白雪樓陽春亭其誤已久沈存中皆以安陸為鄆
他可知矣袁郢曰顧龍門而不見孰兩東門之可蕪注
云楚都南門三門一名龍門一名修門兩東門鄆都東
關有二門也今分荆鄆音焉鄆城音偃又有三荆通典
獨孤信略定北荊州即今河南府伊陽縣東荊州後改
曰淮州今唐州西荊州今鄧州北史獨孤信都督三荆
州是也經外雜鈔曰東晉王忱督荊州始于江陵營城

府曾南豐言襄州韓公井即昭王井有楚故城謂之故牆即郢也

西鄂鄧州東鄂武昌 傳曰翼九宗五正逆晉侯於隨

內諸鄂音鄂晉人謂之鄂侯杜氏曰晉別邑紂時鄂侯或

此地乎輿地記曰今鄂州武昌楚之東鄂也漢為江夏

鄂縣孫權改為武昌鄧州南陽漢之西鄂張衡西鄂人

今南陽有平子墓鄂君之歌則東鄂也

郢鄒一也

郢

陟輸切

鄒

側鳩切

聲轉春秋郢莒用夷故郢

謂之邾婁亦兩音力俱切者合邾婁之音為邾力溝切者合邾婁之音為鄒也與地廣記曰淄州鄒平縣古鄒國也兗州鄒縣邾文公所遷本繹邑也楚宣王滅邾遷之江夏故江夏有邾城今為黃州黃岡縣

扈鄂一也 書曰啓與有扈戰于甘說文曰鄆縣有扈谷甘亭與地記今京兆鄆縣有甘水出南山甘谷此入渭今鄆縣屬西安府秦曰甘亭魯莊會齊侯于扈征南曰鄭地在滎陽卷縣西北元為鄭州原武縣近朝原武

縣不隸鄭州而屬開封漢之卷平聲縣屬河南郡又有扈

潁在今上海縣北十里本海鹽之東堰晉袁山松築壘

以禦孫恩者西安府洛南縣有玄扈山古讀扈如虎

輦之鄆非斟鄩也元凱曰北海平壽縣有鄆音尋亭今

在青州濰縣即斟鄩也周子朝之亂二師圍郊鄆潰杜

注河南輦縣西南有地名鄆中水經注云洛逕偃師縣

南鄆鄆水注之有上鄆下鄆又有鄆地周大夫鄆肸之

舊邑九江為尋陽今作潯又廣西有潯州府音皆同或

曰與鄆通非也嘗按古輿圖志考曰地志青州壽光縣古斟灌城北海縣斟鄩城大康營陽夏相徙商丘相近而依之非居也

鄆新息也

魯會吳伐齊師于鄆

音息

說文姬姓之國在

淮北今汝南新鄆近時汝寧府有息縣是新息正當單作息鄆乃齊地也後漢書馬文淵封息侯亦單作息

白馬之口定胥之口

韓非初見秦王曰決白馬之口

以沃魏氏張儀說趙曰守白馬之津後漢注屬東郡今

滑州白馬縣有白馬山在縣東北水經注黎陽東岍有
故城竹書紀年梁取枳道與鄭鹿鄭鹿即是城也故亦
曰鹿鳴津又曰白馬袁紹攻劉延于白馬即此處又名
黎陽津黎陽今濬州也慕容德從滑臺至黎陽津水合
夜濟改為天橋津周世宗北征命學士為文祭白馬祠
訪于尹拙拙歷數郡國祠白馬者几十餘處杜牧曰黎
陽距白馬津三十里五代屬澶州今之開州也濬滑皆
為大名縣定胥之口正義曰淇水出衛州清淇縣東至

黎陽入河魏志云武帝于清淇口東因宿胥故瀆開白溝道清洪二水入焉水經注宛水東南入淇水右合宿胥故瀆瀆受河于頓邱縣遮害亭東黎山西北立石堰遏水東北注魏武嘉其功故蘇代曰決宿胥之口即指是瀆也通典曹公于水口下大枋木成堰遏淇水入白溝時人號枋頭溝洫志黎陽遮害亭西十八里至淇水口晉桓溫敗于枋頭即此符洪歸枋頭遣使來降謝尚使戴施據枋頭後魏移汲郡治此頓立今亦在開州地

又延津逕滑臺城今開封府延津縣即酸棗曹公遣于
禁守延津曹公又北救劉延至延津即其地一名靈昌
津即左傳之廩延也

黃卷坂桃林塞即新安潼關也潼衝也 潼關在華州

華陰東北三十九里古桃林塞也晉使詹嘉處瑕以守
桃林之塞注云華陰東潼關關西一里有潼水秦函谷
關在漢弘農縣即陝州靈寶縣西南十一里漢元鼎三
年楊僕為樓船將軍本宜陽人恥居關外請以家僮七

百人徙關于新安帝從之初平二年董卓脅帝出函谷關自此以前其關立在新安至建安十六年曹公破馬超於潼關是中閒徙於今所河之北岸則風陵津北至蒲關六十餘里黃卷坂在虢州閿鄉縣西北即潼關路水經注河水自潼關東北流水側長坂曰黃卷通謂之函谷關今攷古函谷關在陝州靈寶縣西南潼關在華州華陰縣自潼關至函谷歷陝華二州之地俱謂之桃林塞項羽坑秦卒在新安世民入關先破新安今仍為河南之

屬縣名潼音昌容切謂河水自龍門南流衝激華山故名
衝關後訛為潼關智按潼即有衝之音義非衝訛為潼也
尋陽原在江北柴桑在江南晉曰江州溫嶠之所移也
尋陽漢屬廬江通典舊縣在江北蘄州界晉溫嶠移
於江州柴桑漢屬豫章晉志有湓口關今為九江府
廬江郡以大江望廬山名敷淺原廬山也禹貢表山
豈彭蠡高山如廬而不表之邪古華作粵如華不注山
以此稱之唐韻淺流疾兒猶漸漸之類勿泥深淺也原

古源字廬山瀑最多其為敷淺原乎廬江今為一縣秦漢以名郡必以廬山為望明矣水經廬江出三天子都謂彭蠡出饒而源于徽之大鄣率山也率山名三天子鄣鄣一作都或曰敷淺原在德安朱子辨之一統志崇陽縣西百一十里雲谿山是敷淺原亦附說也廬山在山海經為柴桑之山張孟奇曰廬山舊名柴桑山因匡君廬而稱廬山郭璞註曰柴桑山與廬山相連據後世淵明柴桑里山為廬山之麓而言也

東興即東關也 巢湖在巢縣西周迴五百里南出于東關口北至合肥界東南有石渠是名關西相傳云夏禹所鑿嘉平四年諸葛恪於東關作大堤遏巢湖巢一名焦後漢記作灤東關今在和州含山縣西九十里含山東晉龍亢地

慎陽當作滇陽 荀淑至慎陽見袁閎師古曰慎字本作滇音真後誤為慎耳今獨有貞丘德陽縣此時有真陽縣屬汝寧府固當日之汝南也閩騶曰永平五年失印

更刻誤以水為心今猶有真丘

沙澍洮強之漢也吐谷渾復興沙澍皆附之洮水出

強臺山東北逕吐谷澤中自洮強南北三百里中莫草
皆是龍鬚而無樵柴謂之強川與澍通渠良切

儻海先零之水也楊軌降于烏孤西奔儻海漢書有

西羌曰先零音憐金城郡令居亦力延切今零儻實相
通遐荒之地名記者隨音而記之耳

士雅山因祖逖而名也梁武遣馬仙琕救義陽元英

結壘上雅山胡三省注上雅當作士雅水經注義陽之東有大木山即祖逖將衆避難所居也智又見魏書中山王英傳于士雅山結壘與曹景宗相抗溫公誤作上宋人小說以祖士雅為士稚陳眉公以為確然今據此仍是雅矣

沮中即祖中也 沮亦音祖吳赤烏四年諸葛瑾取沮中朱然傳征祖中祖中在上黃界去襄陽一百五十里魏夷王梅敷兄弟屯此河南之膏腴郡縣志祖山在襄

州南漳縣漢臨沮界東北一百八里房陵東山沮水所出

八陣圖凡四 郡縣志在夔州奉節縣西七里薛氏曰圖之可見者三一在沔陽之高平舊壘即漢中府西縣東南十里一在新都之八陣鄉即成都府新都縣北十九里李膺益州記曰稚子關北五里其一在魚復永安宮南江灘水上魚復即今奉節縣現今府學是也即白帝城白帝因公孫述時白龍見城與赤甲山接東臨瀼

溪山上尚有魚復城古蹟成都圖經云在夔者六十有
四方陣法也在彌牟者一百二十有八當頭陣法也新
都縣有彌牟鎮在棋盤市者二百五十有六下營法也
南市一名棋盤市與元志西縣亦有之則八陣圖凡四
薛氏曰漢都肄已有孫吳六十四陣竇憲勒八陣擊北
軍晉馬隆又用八陣復涼州是則武侯之前有八陣後
亦未嘗亡也桓溫曰是常山蛇勢徒妄言耳魏刁雍表
采諸葛八陣李靖對太宗曰臣本亮八陣法也孔明受

封武鄉谷在南鄭縣葬定軍山在沔陽故城南今漢中府沔縣

冥阨之塞即郾阨也 魏攻冥阨即此呂覽淮南九塞其一也定四年楚左司馬戌曰還塞大隧直轅冥阨春申君傳秦踰黽隘之塞而攻楚楚世家楚人對項襄王曰涉郾塞而待秦之倦也戰國策莊辛曰穰侯受命秦王填黽塞之口而投已于黽塞之外蘇氏殘均陵塞郾阨均陵即均州郾申州羅山縣申州宋為信陽軍此時

改州羅山其屬縣即漢郾縣也塞郾鼃並音萌戴氏音
郾為毋杏切信陽州在漢為平氏縣魏為義陽後魏郾
州

入川有四棧道三谷舊志以為一者非也何仲默三

秦記曰自秦入蜀有三谷四道三谷者其西南曰褒谷
南曰駱谷從洋入東南曰斜谷從郾入其所從皆殊舊
志謂首尾一谷非是其棧道有四從成和階文出者為
沓中陰平道鄧艾伐蜀由之從兩黨出者為故道漢高

帝攻陳倉由之從褒鳳出者為今連雲棧道漢王之南
鄭由之從城固洋縣出者為斜谷道武侯屯渭上由之
此四道三谷者關之險阨攻取所從來固矣舊志云駱
谷黨谷同一谷褒谷斜谷同一谷

馬鳴閣道利州棧道也 徐晃傳與夏侯淵拒劉備于
陽平備遣陳式等絕馬鳴閣道水經注褒水出衙嶺山
逕大石門歷故棧道下谷俗謂千梁無柱孔明與兄瑾
言云前趙子龍退軍燒壞赤崖以北閣道緣谷一百餘

里其閣梁一頭入山腹其一頭立柱於水中今水大而
急不可安柱此其窮極不可強也又曰頃大水暴出赤
崖以南橋閣悉壞時趙子龍與鄧伯苗一戍赤崖屯田
一戍赤崖口但得緣崖與伯苗相聞而已此即褒斜道
一名石牛道子房燒絕者魏延先退而焚亦是道也後
修路者無復水中柱楊平關在漢中褒城縣西北與江
關白水關為三蜀關今在寧羌州類要馬鳴閣在利州
今保寧府廣平縣即秦葭萌地輿志昭化縣有馬鳴閣

劍州有劍閣棧道褒城謂之連雲棧

郾閣李翕所修西峽閣道也 漢武都太守李翕建寧

五年立碑曾南豐跋辨永叔郾閣頌跋之失

西陽石陽 滿寵知吳必襲西陽西陽在黃岡縣東南

石陽故城在黃陂縣西吳征江夏圍石陽不克而還劉

表使黃祖于此築城鎮遏因名黃城鎮晉志魏文分汝

南立弋陽郡治西陽宋之光山縣也晉為弋陽郡治黃

州黃岡永嘉後始移西陽置故郾城上流五里輿地廣

記黃岡本漢西陵地故今人多稱之而陸抗破步闡陸遜所守之西陵則今之夷陵州也蜀分南郡立宜都吳孫休分宜都立建平通典峽州楚夷陵魏武置臨江郡蜀改宜都吳黃武元年破蜀改夷陵為西陵邾城在黃岡東南百二十里吳克邾城使陸遜以三萬人城而守之陶侃不肯分兵鎮邾城亦是一見庾亮以毛寶戍之果敗

下澁戍鄧塞也

通典在隨州棗陽東南隋志漢東郡

唐城縣西魏改潏西為下澁莊四年楚除道梁澁營軍
臨隨注澁水在義陽厥縣西東南入鄖水今棗陽縣屬
襄陽府隨州屬德安府義陽今信陽州也通典又云襄
陽三百里是魏馬圈鎮陳顯達攻圍不拔在鄧州穰縣
北鄧州即所稱沔北也楚豫連接分割易混王昶言屯
宛去襄三百里急不相赴遂從屯新野宋之穰縣此時
仍為新野縣屬南陽府南陽即宛也宛平聲春秋稱申
南陽今有唐縣古時唐縣大故漢兼下澁之地而今小

耳唐近楚楚之重鎮在魯山魯山為襄蔽漢之堵陽今之裕州汝州即楚之方城也魏時重樊郡縣志襄州臨漢縣本漢鄧州古樊城也今襄陽府志古蹟現在仲山甫之國也一曰鄧塞吳陸士衡稱下江漢之卒浮鄧塞之舟是也曹操救樊駐軍摩陂摩陂在潁川邾縣宋之潁昌府邾縣也智按宋潁昌是今開封之許州而邾縣乃屬汝州

邠陽在鄧漢之間非順陽新陽也 漢中旬陽縣旬水

南入沔鄜商攻旬關正義曰在金州金州後漢末為西城郡魏改魏興申儀為太守屯洵口蘇秦所謂郇陽即洵洵旬郇三字通徐廣以為順陽順陽在鄧州穰縣西新野也索隱以為新陽新陽在蔡州真陽縣西南汝寧也皆非也今漢中興安州魏之金州也楚與秦盟黃棘秦復與楚上庸正義括地志云今房州竹山縣及金州是項襄十九年割上庸漢北地予秦正義謂割金房均三州及漢水之北今漢中府之石泉縣亦漢上庸也丁


度云洵水在晉陽

涂唐今滁州也 涂音滁滁州也晉瑯琊王佃出滁中
即此地吳赤烏十三年作堂邑滁塘以淹北道漢堂邑
屬臨淮後漢屬廣陵九域志真州六合縣楚之棠邑也
今名瓦梁河晉咸和議作涂塘祖約曰棄我也太元四
年謝石師行師屯涂中

東陽不一 劉裕滅廣固築東陽城沈文秀守之而陷
即青州府治東城荀美鎮下邳屯田東陽石鼈固是同

名漢臨淮郡有東陽縣是也按卽邳州今浙又有東陽縣清河郡亦有東陽縣清河桓帝改甘陵唐之貝州宋之恩州今恩縣屬東昌府左傳趙勝帥東陽之師以追齊是也今廣平府清河縣屬唐貝州

散關南北之界也 寶雞南二十里為大散關和尚原在焉山自西來即秦嶺一支不獨為秦蜀之界亦中國南北之界也凡水在嶺南者南行通名曰江水在嶺北者北行通名曰河朱子釋河亦曰北方流水之通名



通雅卷十三

欽定四庫全書

子部
通雅卷十四
五

詳校官中書臣朱文翰

員外郎臣牛檢文覆勘

總校官降調編修臣倉聖脉

校對官中書臣王璜

謄錄監生臣唐淮

欽定四庫全書

通雅卷十四

明方以智撰

地輿

方域

漢之南鄭今漢中府縣是也京兆桓公友封邑之鄭曰西鄭亦曰南鄭今屬華州無其名矣因鄭有園田曰圃鄭因遷曰新鄭今屬開封之鄭州是也滎陽中牟管城則歷代分合今仍存其名為縣皆新鄭之地也 墨莊漫錄疑漢中南鄭京兆有西鄭亦曰南鄭又疑新鄭之名

因穆天子傳屢書天子入于南鄭傳瓚謂穆王所都第
五卷祭父自圃鄭來謁瓚所謂鄭父之丘是也智考之
漢京兆有鄭縣通鑑外紀宣王二十二年封季弟友于
鄭都咸林括地志在華州鄭縣西北三里其曰西鄭者
以圃鄭為東也曰南鄭者華州在鎬京之南也瓚謂鄭
桓公無封京兆之文師古又曰穆王以下無西鄭之事
瓚說非也此皆混于其名耳穆王出遊入必返西鄭鄭
近都蓋圻內之邑也或別宮在焉應劭曰友封于西鄭

其子與平王東遷更稱新鄭一統志漢中府附郭曰南鄭即下鄭桓公沒于犬戎其民南奔居此因曰南鄭此皆附會之說蓋漢中自在京兆之南也鎬京稱西鄭曰南鄭乃當時都人之稱也穆王時已有圃鄭矣地名相同者多耳水經注竹書紀年晉文侯二年同王子多父伐鄆克之乃居鄭父之丘名之曰鄭是為桓公世紀云有熊氏之墟黃帝所都也服虔云鄭取鄆而不居其都杜預曰鄆在滎陽密縣東北新鄭在滎陽宛陵縣西南

由此觀之或者桓先封華州後伐鄆而封鄭乎是未可知也爾雅曰鄭有圃田注一名原圃漁仲曰在中牟西北七里鄭州管城縣東三里管城管叔所封或疑宋時中牟管城相去僅得十里而分兩縣邪蓋謂縣距其澤邊如此耳其澤東西五十里南北二十六里西限長城東極官渡上承鄭州管城界曹家陂又益西北流為二十四小陂小鵠大鵠小斬大斬之類此見善長所記猶有大灰小灰散嚇羊園等名今開封府鄭州領滎陽而

禹州領新鄭又別立中牟即廣武地而西北圃田澤在
焉則分其地也今之陝西華州在唐宋皆領鄭下邳華
陰渭南蒲城五縣於鄭則曰鄭桓公所封邑有大華山
灌水沈水金改全安軍以商州為支郡所領亦與唐宋
同元復為華州領三縣至今因之後以渭南屬西安府
惟領華陰蒲城二縣

下邳之邳如程 書序曰維周王季宅程孟子文王卒
於畢邳史記正義引周書云惟周王季宅邳邳故城在

雍州咸陽縣東周之郢邑也詩正義周書稱文王在程作程寤程典皇甫謐云文王徙宅於程蓋謂此關駟以爲右扶風安陵是智來蒼梧見土人稱梧州北四十里曰下郢讀之如程可知古郢字有程音故相通也

崆峒或爲空桐空同 漢書作空同爾雅北戴斗極爲

空桐故云在梁國虛城東三十里焦氏誤刊黃香九宮賦作瑩洞唐地理志在岷州溢樂縣西今西和州史記黃帝至空桐韋昭曰在隴右正義曰笄頭山一名崆峒

在原州平高縣今平涼府西即崆峒山有廣成子宮臨
洮府亦有崆峒山括地志在肅州福祿縣東南今肅州
衛即漢酒泉郡漢武亦于隴西登空桐水經注獲水逕
空桐澤哀二十六年宋景公遊空澤卒大尹奉公自空
桐入是也又贛州吉水汝州肇慶陽江縣皆有崆峒山
北陵雁門也山海經雁門之山無草木雁出其間有
雁門水經注云即北陵在高柳北高柳在代中今雁門
關在太原府代州有句注雁門山

廣陵之稱揚州自隋始也 通鑑樊毅克廣陵楚子城
非江都之廣陵也按魏太和中蠻帥田益宗納土于魏
魏為立東豫州治廣陵城五代志汝南郡新息縣魏置
東豫州則此廣陵乃新息之廣陵也又梁武帝置楚州
于汝南郡之城陽縣治楚城即楚子城也秦氏曰凡稱
揚州者東漢指歷陽或壽春或曲阿中原自魏至周指
壽春或合肥江左自吳至陳指建業或會稽隋唐五代
乃指廣陵廣陵在二漢時為吳國江都廣陵國廣陵郡

劉宋為南充州北齊為東廣州後周為吳州唐初亦為
刊州其為揚州自隋始也祖述中流誓所對京口舊濶
四十餘里今濶十八里合瀆渠即吳掘之邳溝東北道
射陽湖亦曰山陽瀆水經注曰下邳城漢徙韓信為楚
都文穎曰秦置東陽郡今下邳晉灼曰本屬臨淮明帝
分下邳後分屬廣陵故張晏曰東陽郡今廣陵也伯厚
言唐韓皋誤者因皋謂廣陵散指儉誕舉事而散於廣
陵也劉邠中山詩話謂揚州治壽春儉誕皆死壽春則

韓皋之言誠誤矣嵇康得廣陵散於華陽亭則在密縣
漢魏之揚州今壽州也 通典壽春郡後漢揚州刺史
領郡六治此魏曰淮南仍揚州為重鎮儉誕治此晉元
帝永昌中豫州刺史祖約自譙還鎮於此宋義熙劉義
慶又鎮此永元初裴叔業以城降魏後魏曰揚州梁武
普通七年克之置南豫州後降魏陳太建復得壽陽為
豫州隋改壽州今壽東四十里宋殷琰築四壘於此宋
之安豐軍古壽春也其城築自楚考烈王徙都而經始

焉

陸口蒲磯口也 魯肅呂蒙屯陸口在鄂州蒲圻縣南
寰宇記曰即陸溪口也水經注練浦東合練口江浦也
直南練洲江之右岸得蒲磯口即陸口也水出于下雋
縣三山溪

一合塢城宜陽也 六國表秦惠文王二年拔韓宜陽
韓昭侯廿四年也秦武王四年拔宜陽城韓襄侯四年
也漢屬弘農郡隋志洛州宜陽縣後魏置宜陽郡東魏

置揚州後周改曰熊州通典曰河南府福昌縣漢宜陽縣也縣城即魏之一合塢城東南北三面峭絕天險宇文周重兵于此以備高齊水經注曰一合塢惟築一面伯厚誤作一金塢蓋龜池縣治南對金門塢水南五里舊宜陽縣治也

吳會吳郡會稽郡也 永建四年分會稽為吳郡吳志朱桓部伍吳會二郡莊子釋文云浙江為吳會分界是也後人誤以為一處非矣陸廣微曰漢順帝永建四年

分吳郡會稽為兩浙

淞江去水乃以名郡 松江本緣淞江得名其地下每
有水災乃去水而作郡吳淞江今吳江寶帶橋一路是
也亦名松陵眉州有江亦名松江即蜀江分派過州城
與醴泉江合

教山教水即峭也三峭又名嶽崙山 在河南汝寧縣
北三十八里自東峭至西峭三十五里輿地廣記峭連
入硤石界所謂南陵夏后墓北陵文王避風雨者也晉

敗秦于殽陝州石壕鎮本殽縣後魏改硤石汜水縣又有古殽關其名同也山海經教山教水即殽字成山關水即涿字

蛾眉謂其似也 陸文裕曰峨眉本以兩山相對如蛾眉故名字當從虫今分三峨又汀州歸化縣邵武泰寧縣廣西太平府汝州皆有蛾眉山而東西梁山名蛾眉亦以采石望之似也字書加艸加木加邑加山者多矣荆楚古通稱曰荆舒舒古屬楚 春秋莊十年書荆傷

元年始書楚孔氏曰殷武荆楚並言之楚之稱荆久矣
熊繹在荆山後居郢即荊州以其居荆故稱荆荆楚于
字義亦一物也舒有羣舒舒鳩舒蓼舒庸之屬今有舒
城其遺也舒鳩今無為州巢縣舒蓼在安豐今之六安
也舒庸以為東方國謂之羣舒皆偃姓皋陶後又有龍
舒地理志在廬江縣西今為散邑桐城唐稱舒州總言
皖郡也

楚伐吳至衡山今之橫山也 楚伐吳克鳩茲至于衡

山鳩茲今蕪湖非衡山明矣然橫山亦不一南京溧水
之南鄉有橫山廣德有橫山松江有橫山湖州有橫山
顏魯公吳興地記烏程縣境有顓頊冢圖經云晉初衡
山見顓頊冢有營丘圖言衡山即楚伐吳克丘茲之衡
山也今曰橫山顓頊都帝丘今濮陽大名豈有冢在此
豈舜葬蒼梧禹葬會稽之事乎烏程又有杼山言夏杼
巡狩至此杼夏七世王也禹會會稽杼自至此安知南
方非舜禹所收而商周復棄之耶

魯口夏口也沙羨也晉以武昌名郡通典所謂鄂州也
庾亮南樓正在此而伯厚以為在武昌縣則沿舊說也

春秋曰夏汭自後漢末曰夏口亦名魯口吳錄黃祖

為江夏太守始于沙羨

音夷

置屯山簡自襄奔夏口庾翼

為荊州治夏口劉毅以為夏口二州之中請劉道規鎮

之六年自臨邛徙鎮夏口城據黃鵠磯晉地理志沙羨

夏口對沔口吳黃武二年城沙羨通典曰即鄂州劉表

傳注夏口即鄂宋武平義宣分為鄂州鎮夏口隋復為

鄂州夏本江之沱自江陵東南流東過華容雲杜入沔
謂之堵口冬竭夏流總合襄漢至魯山東入岷江曰沔
口今曰漢口江南即江夏黃鶴樓今武昌府治也沙羨
宋之鄂州而武昌縣為故東鄂晉有鄂縣是也伯厚因
此遂曰庾亮南樓非鄂也豈孫吳已城沙羨而庾鎮尚
不居要地耶凡都督必居形勝之地一語可斷唐武德
中以此地稱武昌軍節度而晉書庾翼為荊州治夏口
自黃祖屯此知為兵衝要地豈建節反取山僻邑耶前人

注解牽泥舊名而攷究家承之實不然也

劉錡順昌之捷今之潁州也 宋趙彥衛曰一州四名

如會稽郡名越州名紹興府名鎮東軍額一州三名如
吳郡名蘇州又名平江有交互難別者如潁州曰順昌
府許州曰潁川之類

晉新亭非吳新亭今之新亭非晉新亭矣 宋時建康

新亭在朱雀航西五里俗名鵝頂程大昌謂晉之新亭
在長干寺南不當在鵝頂按晉劉氏世說吳新亭舊基

已淪隆安中司馬恢徙創今地安知此地不又徙乎今則並非王導正色之地矣丹陽記有三亭司馬恢一亭太元中謝石創征虜亭三吳縉紳創治亭

舊名北苑茶今作北源 丁晉公有北苑茶錄三卷世多指建州茶焙為北苑故姚寬叢語謂建州龍焙面北遂謂之北苑此說非也李氏都建鄴其苑在北故得稱北苑水心有清輝殿張洎為清輝殿學士別置一殿于內謂之澄心堂故李氏有澄心堂紙其曰北苑茶者是

猶澄心堂紙耳今則徽州松蘿以北源名

中潭河陽之中城也 河陽三城南城在河陽縣西即

孟津亦曰富平津中潭城東魏元象元年築唐李光弼

守此禦史思明方勺曰河陽中城曰中潭黃河西派貫

三城之間潭音誕爾雅曰沙出也江東呼水沙堆為潭

越人以川流淺急處為潭潭灘實一字皆他丹切說文

曰灘水濡而乾也引詩灘其乾矣孫氏呼旱切竟作曄

字楞嚴經乾為州潭音此方人據字書而抄其音釋耳

智曰夫非房融筆受耶

二周之地以東萊為確然成周謂之總名有之 鞏洛
今河南鞏縣洛陽縣也二周威烈王之後西周河南也
曰王城東周洛陽也曰成周徐廣曰東周比亡之時凡
七縣河南洛陽穀城平陰偃師鞏緱氏自考王封其弟
揭于河南以續周公之職是為河南桓公在陽城故地
威烈王嗣位西周惠公封其少子班於鞏以奉王實東
周惠公此東西周分之始也按左傳昭二十六年晉師

克鞏周紀惠公封其子于鞏東周王所居洛陽也鞏班
之采邑也馬貴與亦載鞏為東周所居誤矣顯王二年
趙與韓分周為二顯王雖在東周特建空名于上耳周
本紀云赧王時東西周分治非也赧王特徙都西周耳
呂東萊大事記曰西周河南即夾鄆武王遷九鼎周公
營以為都曰王城東周洛陽周公所營下都以遷頑民
是為成周鮑彪注國策即以赧王為西周君為正統此
誤也邵子經世亦誤公羊傳曰王城者何西周也成周

者何東周也昭二十六年天王入成周三十二年城成
周蓋敬王定遷在既城之後而孫莘老胡康侯皆以成
周即京師亦未考王城成周之實而誤合為一也智按
續漢志河南縣周公所城雒邑也春秋時謂之王城東
城門名鼎門北城門名乾祭豈非因郊鄆定鼎而名乎
帝王世紀曰河南城西有郊鄆陌在漢時河南郡有雒
陽縣成周也有河南縣郊鄆王城也卜澗水東瀍水西
平王居之今苑內故王城是也又卜瀍水東是為成周

今河南府故洛城是也地道記曰王城去雒城四十里
今之河南府有洛陽故城在府城之東洛水之北即成
周自東漢西晉後魏皆都之新安縣則為春秋時西周
地伯厚曰洛水之北亦有鼎中觀成周有狄泉在城中
據通典則狄泉在洛陽城東三十餘里呂氏又曰洛陽
雖有二城而成周則其總名杜預孔穎達皆以下都為
成周謂敬王避子朝之亂自王城徙都之其說非一端
也升菴再引之而智謂總名亦有其理

華亭在密縣 史記秦昭王三十二年白起攻魏拔華陽走芒卯斬首十五萬司馬彪曰華陽亭名在密縣嵇叔夜常採藥于山澤學琴于古人即此亭非松江之華亭縣也唐李茂貞於隴州廢華亭縣以縣為州治宋改儀州後廢州以縣屬渭州

桐丘城在許 洧水又東南逕桐丘城春秋左傳莊公二十八年楚伐鄭鄭人將奔桐丘即此城也杜預曰在潁州許昌城東北又兗州路有桐城驛故邑之名桐城

則自唐始徐鉉稽神錄言舒州桐城縣雙港有風吹錢過市事又言僧德材至桐城永叔傳梅聖俞曾歷桐城主簿馬總曰咸通中孔威刺舒進龍骨云桐善政鄉龍鬪死今志未載

茱驄即大驄具茨山也 水經淇水出河南密縣大驄山注云即具茨黃帝登具茨升洪堤受神芝圖于黃蓋童子史伯答桓公曰如前莘後濁左洛右濟主丕驄而漕洧鄭語作主茱驄而食漕洧韋昭曰茱驄山在密縣

田悅改魏州曰大名而大名之魏在蒲州 畢萬曰大名之魏在今之蒲州宋之永樂縣也而唐魏州乃曰大名今號大名府五代以大名為鄴都李氏得之改其府曰興唐石氏得之改其府曰廣晉而其軍曰天雄總之故魏州也田悅改大名見國都下

秦亭即街亭 馬謖與張郃戰于街亭今在靈昌府秦州所謂秦亭即街亭也以為在南鄭即誤矣秦州古成紀地漢天水也

蒙茶在蜀非山東之蒙也 諺云蒙山頂上茶乃今雅
州之蒙山唐李德裕入蜀得蒙餅沃於湯餅移時盡化
而兗州費縣之蒙山亦載蒙頂茶青州蒙陰之蒙山亦
載其巔產茶乃草藥也燮曰禹貢蔡蒙一云蒙在雲南
蔡沈云同在雅誤

齊桓葵丘在考城非青州之葵丘也 齊桓會諸侯之
葵丘據括地志在曹州考城縣東南一里考城今屬歸
德府矣非青州臨淄之葵丘也說文作鄒丘又有鄒地

在臨汾漢祭后土處管子輕重丁篇有崢丘注即葵丘
濮潞霍瑯琊不一 伊尹為四方獻令正南百濮鄭語
楚蚡冒始啟濮通典有尾濮水綿濮爾雅南至于濮鉞
不獨大名之濮陽也南中志談藁縣有濮獠又有閩濮
水經注異水逕長杜南濮北濮水出焉衛靈間靡靡之
樂於此漁陽有鮑丘水又名潞水檀州密雲縣有潞水
自塞外流入今通州有通潞亭非獨山西之潞安也滌
州全椒有瑯琊山瑯琊谿青州府諸城有瑯琊山始皇

常留此三月即勾踐觀臺也尚有瑯琊城漢瑯琊郡治
此職方冀州山鎮謂之霍大山在晉州霍邑東北三十
里今之霍州又潛山縣天柱峯名霍山漢武所望封廬
州又有霍山縣輿地記以鳳陽府之霍丘縣為周霍叔
所封則稱平陽之霍州為霍叔者必有一誤矣

熊耳介兩省非有二也 洹記曰熊耳山在商州上洛
縣南四十里商州今屬西安府其洛南縣即漢上洛也
禹導洛自熊耳則在虢州盧氏縣界盧氏今屬河南府

之陝州輿地記曰兩峯若熊耳即達磨葬處是有兩熊耳矣智按熊耳在陝西河南之界輿地于商州熊耳載伊水所出而伊水出盧氏閼頰嶺經洛陽入洛可徵矣水經注曰宜陽有熊耳山雙巒並舉光武破赤眉樊崇積甲仗與熊耳山齊齊桓登熊耳望江漢極目也山際有池世謂之鼃池均水出浙縣北山即熊耳之枝

章華乾谿有數處皆譌傳也 筆談曰天下地名錯亂乖謬率難考信如楚章華臺亳州城父縣陳州商水縣

荊州江陵長林監利縣皆有之乾谿亦有數處據左傳
楚靈王七年成章華之臺與諸侯落之杜預注章華臺
在華容城中華容即今監利縣非岳州之華容也至今
有章華故臺在縣郭中與杜預之說相符亳州城父縣
有乾谿其側亦有章華臺故其臺下往往得人骨云楚
靈王戰死於此商水縣章華之側亦有乾谿薛綜注張
衡東京賦引左氏傳乃云楚子成章華之臺于乾谿皆
誤說也左傳實無此文章華與乾谿元非一處楚靈

十二年王狩于州來使蕩侯潘子司馬督囂尹午陵尹喜帥師圍徐以懼吳王次于乾谿此則城父之乾谿靈王八年許遷于夷者乃此地十三年公子比為亂使觀從從師于乾谿王衆潰靈王亡不知所在平王即位殺囚衣之王服而流諸漢乃取葬之以靖國人而討以乾谿靈王實縊于羊他年申亥以王柩告乃改葬之而非死于乾谿也昭王二十七年吳伐陳王帥師救陳次于城父將戰王卒于城父而春秋又云殺其君于乾谿

則後世謂靈王實死于是理不足怪也

成陽與城陽自別 黃長睿曰永叔集古錄靈臺碑以
為史記地志水經諸書皆無堯母葬處予按漢章帝紀
注述征記咸陽縣東南有堯母慶都墓又按水經注今
咸陽城西二里有堯陵陵南一里有堯母慶都陵集古
又云俗本多作城陽獨此碑為咸陽予攷咸陽與城陽
自別咸陽縣屬濟陰城陽乃漢齊悼惠王之子章所封
之國名集古又云廷尉某姓名磨滅予按廷尉仲定碑

云遷廷尉卿託病乞歸修堯靈臺黃屋三十餘而靈臺
碑中有云濟陰太守成陽令各遣大掾輔助仲君故知
仲定無疑

傳險傳說所隱窟也 地理志傳險即說所隱之窟名
升菴曰險古巖字聖人窟今在陝州

秦峒即太行山 升菴曰湯歸至于秦卷陶索隱曰鄒
誕生卷作峒則卷當作峒與尚書同非衍字也慎按秦
峒即太行行元有此音列子作太行山海經五行之山

按行有刑音則與垌音近耳

汲黯卧治之淮陽在陳州非淮安也淮安淮陰也漢

高夷彭越分梁地為二國立子恢為梁王子友為淮陽

王文四年徙代王武為淮陽王通典漢淮陽郡故城在

陳州宛丘縣西南汲黯卧治此也後魏尉元曰先定下

邳平宿豫鎮淮陽城東安則青冀諸鎮可不攻而克興

地廣記曰淮陽縣在泗揚之間有淮陽城梁置淮陽郡

而隋廢之唐貞觀省入下邳水經注淮陽城北臨泗水

宋為淮陽軍今淮安府漢屬臨淮郡曰淮陰晉曰山陽
唐宋之楚州也祖逖屯淮陰劉隗鎮守即此地南齊志
永和中荀羨云淮陰地形都要水陸要衝故立城池寰
宇記故淮陰縣城在山陽縣宋陳敏曰楚州為南北襟
喉長淮二千餘里河道通北方者五淮汴渦潁蔡是也
其通南為楚州運河一處周世宗自北神堰鑿老鸛河
通戰艦入大江而南唐遂失淮南之地劉季裴曰謝玄
八千人當苻堅九十萬揚行密清口三萬人當朱全忠

八州之師則扼淮之力也薛氏曰自孫氏作涂中東興塘鄧艾築石鼃以營田在寶應西荀羨填下邳屯田于東陽之石鼃南唐瓦梁堰障蔽長江南唐修東西瓦梁城皆為扼淮之助其曰角城者晉義熙中立大寧中劉遐退屯泗口即其地蓋淮泗之會也今屬宿遷縣

中年有二 一在河南一在河北能改齊漫錄辨之

呂梁有三 莊子呂梁在呂梁縣南泗水上有石梁司馬彪曰呂梁在離石縣南水經注浦水出善無縣歷呂

梁之山為呂梁洪今呂梁在徐州下百二十里

三河 唐堯都河東殷都河內周都河南故稱三河升

菴曰黃河析支河湟河亦稱三河唐詩曰天子三河募

少年

三楚 淮北沛陳汝南二郡此西楚也彭城以東東海

吳廣陵此東楚也衡山九江江南豫章長沙此南楚也

或曰楚文王都郢楚昭王都鄂楚考烈王都壽春故曰

三楚

三秦 項羽三分關中地封章邯雍王司馬欣塞王董
翳翟王故稱三秦

三吳 圖經云漢分會稽為吳與吳興丹陽為三吳通

典同水經以吳興吳郡會稽為三吳指掌圖以蘇常湖

為三吳其說不同七修稿云春秋之吳都蘇常之間漢

封之吳都會稽

即蘇常嘉杭非
紹興之會稽也

三國之吳初為會稽太

守封吳侯

即蘇松常鎮
杭嘉湖之地

備記之

三梁三齊三蔡 謂南梁大梁少梁齊及濟北膠東新

蔡上蔡下蔡

三關不一 陽平江關白水乃蜀漢三關也平靖武陽
黃峴郡縣志載義陽三關也晉秦始割南陽置義陽郡
上黨壺口石陘馮衍傳上黨三關也益津關在霸州瓦
橋關在雄州淤口關在信安軍此周世宗所取三關也
偏頭倒馬紫荆山西之三關也

五嶺不一 張耳傳秦南有五嶺之戍師古曰西自衡
山南東窮海一山之限耳而別標五者裴淵廣州記曰

大庾始安臨賀桂陽揭陽是為五嶺鄧德明南康記曰
大庾一桂陽騎田二九真都龐龍音三臨賀萌渚四始安
越城五輿地記一曰臺嶺一曰塞上即大庾也二曰騎
田三曰都龍四曰萌渚五曰越嶺按九真太遠當以裴
說為是伯厚曰騎田即彬州臘嶺都龐即道州永明嶺
此渚即道州白芒嶺則道州有二可疑也廣川書跋唐
李侗為衡州刺史言衡陽為五嶺門廣川辨之以裴潛
所說為是蓋或又一五嶺也

有崑崙有小崑崙有崑崙塞有崑崙丘 禹本記崑崙
高二千五百餘里山海經內崑崙虛帝之下都方八百
里而有九折五門郭璞曰此自別有小崑崙也淮南子
曰崑崙虛中有增城九重木禾珠樹玉樹瑄樹不死樹
十洲記之崑陵即崑崙故曰有五角神異經云崑崙有
銅柱因河圖天柱說也張騫渡西海至大秦烏遲國復
有西海海濱有小崑崙高萬仞方八百里永平實固出
燉煌崑崙塞擊破白水軍於蒲類海上章懷太子注謂

崑崙山名因以為塞在今肅州酒泉縣西南周穆王見西王母於此山有石室博物志引河圖括地象曰崑崙廣萬里泉南流入中國曰河八十城布繞之中國居一分是姦城也今南寧府泉州永春縣皆有崑崙山梧州陸川縣有崑崙水燮曰崑崙言其形渾淪高大不可測也地球為五大州環海包之每州必有中高崑崙亞細亞之中高也故其水皆分面而趨

九山九川九州之山川也 此禹貢九山刊旅九川滌

源注極是史記正義以汧壺口砥柱太行西頃熊耳嶧

冢內方汶為九山

此汶即岷也

索隱曰汧壺口砥柱太行西

頃熊耳嶧冢內方岐是九山也古分為三條故地理志

有南北條之荆山焉馬融王肅皆因之鄭玄以為四列

一行以為兩戒索隱之言則以弱黑河漾江沅淮渭雒

為九漾即漾漾即西漢也呂氏春秋九山會稽太山王

屋首山太華岐山太行羊腸孟門鄭樵曰州縣之設有

時而更山川之形千古不易所以禹貢分州必以山川

定經界使兗州可移而濟河之兗不可移使梁州可遷而華陽之黑水梁州不可遷後之為史者主為州縣州縣移易而其書廢矣

徑言徑也峴言嶮也太行八徑兩路入燕 謝康樂詩

苕遞涉徑峴

音刑顯

徑為徑之平聲峴為嶮之外聲青州

襄陽以峴著太行以徑著山海有少徑山御覽謂在榮陽齊桓伐楚次于徑楚世家魏取徑山蘇秦于韓曰南有徑山于楚曰北有徑塞楚子治兵于汾注在襄城智

按屬汝州所謂汾陁之塞在汝鄭二州非山西之汾陁也太行八陁專在北方呂覽淮南皆云太汾澠阨荆阨方城穀阪井陘令疵句注居庸為九塞元和郡縣志太行山首起河內北至幽州凡有八陁軹陁太行陁白陁陁在河內滏口陁在鄴西井陘飛狐陁真蒲陰陁保定紫荆在中山軍都陁昌平居庸在幽州鎮州獲鹿縣井陘關曰土門太行第五陁也第四滏口陁對鄴西滏水燕慕容垂出滏口入天井關唐李光弼出土門破史思明軍韓信

擊趙東下井陘今真定有井陘縣獲鹿與太原府平定
州皆有井陘關水經注所云長嶺通道即鉞陘也穆傳
之鉞隊三陞也代州靈丘縣西北有石銘題冀州北界
號石銘陘愚者曰紫荆北口浮圖峪為飛狐軍都陘即
居庸此二陘為燕背腋李存勗命周德威出飛狐入幽
執劉守光父子同光三年阿保機從居庸圍幽州唐主
遣李嗣源救德威宣和四年金阿骨打從居庸入燕嘉
定四年鐵木真克宣府懷來金保居庸乃留兵拒守而

大兵趨紫荊入拔易涿反自南攻破居庸而卒入燕此其勢也

率山即三天子都今之張公山也 朱大同曰徽之張公山即率山在黟績間智考之在今休寧婺源間汪南溟辨證甚詳晰吳澄地理表曰率山乃江南諸山之祖山海經所云三天子都實彭浙兩源乃斷然知是張公山而以昔所謂黟山率山大鄣者本一山也石上尚有三天子都刻字水經曰浙江出三天子都廬江出三天

子都都一作鄣水流彭蠡又流漸卽浙也堪輿承訖言
廬山出天子地卽以形家論彭湖之水過宮反背矣
芝嶽太和山也 卽武當也今曰太和山玄帝之先淨
樂國王治麋今均州也有榔梅祠玄帝曾折梅寄榔曰
道成當結實後果然舊為武當縣南山如負宸惟玄武
足以當之其宮制視漢未央宮宋諱玄稱真武

闕里因石闕而名 曲阜志西南三里有雙石闕卽靈
光之南闕也按今兗州府有靈光殿有闕里云魯共王

壞孔子宅處

儀封屬開封 類考云開封蘭陽有儀城即封人見孔

子處智按今開封屬有儀封縣蘭陽縣孔子初失位去

魯適衛北自夷儀入後又自蔡反衛南自石門入

互鄉今在睢州 互鄉名古廬里王无咎云鹿邑之外

有互鄉城

始興之鼻天子冢非象庫也 有鼻即有庫零陵縣有

有鼻墟一統志始興鼻天子冢有人掘得銅人無數三

代以前豈有銅人殉葬之事必非象也羅長源作路史乃以始興鼻天子冢為象庫張東莞云舜墓是商均所葬蓋因山海經蒼梧舜與叔均之所葬也

比景當是北景 漢日南郡有比景縣晉亦如之隋平林邑立比景郡唐於驩州南境僑立景州比景縣非正比景也貴與曰比音芑蔭之芑按古曰北戶謂開北戶以向日唐萬年縣尉段公路文昌之孫作北戶錄是也太平御覽曰交州去路九千餘里孫慄云立表效景景

在表南其古郡以日南為名其斯義乎又有比景縣比
北二字相似據此則應是北景周禮大司徒土圭正日
景有南景北景之說當時或以此名然自漢以來傳訛
作比矣

木葉城在三衛 徐文長記木葉城在遼東余于遼史
始見有此名今說詩者以沈雲卿九月寒砧催木葉之
句為地名以對遼陽則合掌癡極毫無風致矣智考木
葉城在薊州外馬蘭諸山今三衛地文長以為在遼東

亦非

花門堡在甘州 吳曾曰杜子美好言花門按唐志甘
州有花門山堡東北千里至回鶻衙帳故有畱花門詩
一首又云花門鶚面請雪恥又云聞道花門將論功未
肯歸又云聞道花門破和親事却非楊巨源亦有送太
和公主和番詩云蘆井尋沙到花門度磧看薰風一萬
里來處是長安岑參送封常清西征叙曰天寶中朔方
回紇寇邊踰花門

三驍即三苗 在堯時為譯地在今日則為中國乃湖
廣江鄂嶽之三州故今三州人尚有苗姓升菴引國名
記三苗作三驍朱子曰三苗當作猫與狔獠為四種
溪峒之民說苑曰舜時有苗不服者大山在其南殿山
在其北左洞庭之波右彭蠡之川以此言之則當是衡
州長沙之東袁州之西一帶今不知曾有苗獠之遺種
而五溪蠻乃在辰州黑白苗乃在沅州麻陽之左古寶
慶武岡新寧所在有獠其說苑臆耶或古今變異耶三

危陳氏引韵注說文作𧈧古文尚書作𧈧或作峴變曰
舜所竄止于三苗之君故其種類仍居湖北也

廣有蠶戶

南海記蜒蠻以舟為室蜒有三一為魚蜒

善舉網二為蠔蜒善沒海三為木蜒善伐材木今廣東
有蛋戶音旦字書本作蠧蜒仍音延常璩巴志曰涪陵
郡諸縣北有獯蠧劉宋時廣州刺史羊希使劉思道伐
俚李延壽曰其流曰蠧曰獯曰俚曰獠曰色色音夷今
則粵西有獯有獯有猺瓊州之蠻曰黎人沅靖貴州之

蠻通謂之苗麻陽蠻有犵狫或曰𠙴
𠙴音犛犛音狪狪音狪又

𧯛音
𧯛
𧯛
卿音
狢
出音

出音
又

俚別種

盤瓠五溪蠻也本于白犬故附會高辛嫁女之說 盤
瓠蠻誓狀云某等既克山職今當鈐束男姪男行持棒
女行把麻任從出入不得生事上有太陰下有地宿其
翻背者生兒成驢生女成猪舉家滅絕不得翻面說好
背面說惡不得偷寒送煖上山同路下水同船男兒帶
刀同一邊一點一齊同殺盜賊不用此款者並依山例

山例者蠻言誅殺也具載范文穆公桂海虞衡志陸文裕又載南詔乞書藥文習夫子之言便有華風附詩亦是唐律今辰州地即古五溪蠻長源引伯益經曰卞明生白犬為蠻人之祖乃人名也後遂云高辛之犬銜犬戎吳將軍首以少女妻之生六男六女風俗通載之然高昌之祖牝狼負人劉宋元嘉婢為狗婦何訝古事但定高辛以女嫁之則荒唐矣蠻溪叢笑多言彼中風俗今山海經作弄明生白犬

苴苴城雲南近遵義之地也 薛能聞官軍破吉浪詩

越雋通遊客苴苴鬧聚蚊又西縣詩野色生肥芋鄉儀
搗散茶梯航經杜宇烽火徹苴苴則苴苴為迷麻反唐書
李晟曲環救蜀合擊吐蕃南詔破之異牟尋懼築苴苴
城今雲南大理府一統志以為咩地

龍戶驩家馬人馬流也 卮言曰韓退之詩衙時龍戶
集上日馬人來吳垌云長安有龍戶見水即知有龍或
引出但如鯀魚按此是潮州時上廣帥作非長安也馬

人演繁露引毘奢利王時有如馬裸露王分身為蠶被
乃得衣馬人感戀恐非也按俞益期牋云馬文淵立銅
柱岸北有遺兵居壽冷岸南對銅柱悉姓馬號曰馬留
又記一小說龍戶在儋耳其人目睛皆青碧入水能伏
一二日蓋即所謂崑崙奴也升菴則以象奴為崑崙奴
智按今方隅勝畧自有龍家馬人二種龍家為驪氏之
後其種有四馬人散處南海當是馬流耳俞益期本作
馬流段成式作馬留驪當是驪驪古與龍通音如交州

都麗音龍可証故駝家轉而為驪家又轉而為龍家耳
者樂甸本馬龍他即甸猛摩之地 雲南有者樂甸長
官司或曰此亦名龍戶然則退之與馬人並舉者乃龍
戶之在嶺粵者而此亦其類也

疏伽天堂河也 大藏西域記云阿耨達地在香山南
大雪北周八百里東南流入海者曰疏伽河西南流入
海者曰縛芻河西北流入海者曰徙多河又潛流地下出
積石山東北流入海者為中國之河源阿耨達華言無

煩惱似指所謂星宿海者琬伽華言天堂縛芻華言清
徒多華言冷琬渠京切字書琬琬欲死也不知譯者何
獨借此字

林邑古越裳而老撾亦古越裳地也 雲南有老撾宣
慰司俗呼撾家通交趾暹邏入海

狼臙臙國也 水經注九真水度淮北岸有橋即彭龍
區粟之通達檀和之大戰東橋處也水又逕船官口源
出徐狼外衆皆裸身以竹筒樹葉掩形名狼臙惟依冥

夜與人交市閭中鎡金皆知好惡

離耳即儋耳也 山海經曰離耳雕題在鬱水南林邑

記九郡有儋耳民徒跣耳廣垂以為飾以黑為美離騷
所謂玄國然則儋耳即離耳也淮南言耽耳在其北方
則南北皆有此名今儋州屬瓊州府

九彛在徐州莒魯之間 劉敞說也馮厚齋以朝鮮東
彛九種非也或曰孔子喜郊子與程本

李白書禹穴在蜀 丹鉛曰史遷言上會稽總吳越也

探禹穴言巴蜀也後人誤解禹穴在會稽按禹生蜀石
泉縣古碑禹穴李白所書也古人文不重複如雲土夢
作又括江南北千里蔡蒙旅平蔡在雅州蒙在雲南亦
括千餘里智按禹穴奇在委宛書耳廬山禹刻亦云石
穴凡禹到皆名之

通雅卷十四